

## PKPD di beberapa lokasi di Sabah, Pahang mulai esok

[Rafidah Mat Ruzki](#) - April 13, 2021 @ 7:17pm

[fidahruzki@bh.com.my](mailto:fidahruzki@bh.com.my)



Foto hiasan BERNAMA

PUTRAJAYA: Kerajaan akan melaksanakan Perintah Kawalan Pergerakan Diperketatkan (PKPD) di beberapa lokasi di Sabah dan Pahang bermula esok, susulan peningkatan kes COVID-19 di lokaliti terbabit.

PKPD akan dilaksanakan di Pasar Sim-Sim dan perumahan Sim-Sim, Mukim Berhala serta Kampung Sungai Obar, Batu 7, Mukim Sentosa di Sandakan; Taman Villa Mas, Tawau; dan Kampung Melangkap Tomis, Kota Belud, manakala PKPD yang akan dilaksanakan di Pahang membabitkan empat perkampungan di Temerloh, Pahang.

Menteri Kanan Keselamatan, Datuk Seri Ismail Sabri Yaakob, berkata empat kampung itu Kampung Paya Pulau Tengah, Kampung Pulau Terap, Paya Pulau-Kampung Batu 4 dan Paya Pulau-Kampung Batu 5, Jalan Maran, selepas Kementerian Kesihatan (KKM) hari ini melaporkan peningkatan kes positif COVID-19 di lokaliti terbabit.

Bagi PKPD di Pasar Sim-Sim dan perumahan Sim-Sim, serta Kampung Sungai Obar, KKM sudah melaksanakan 38 ujian saringan di kawasan perumahan Sim-Sim dan daripada jumlah itu, sebanyak 17 kes positif COVID-19 direkodkan serta 46 ujian saringan dilakukan di Kampung Sungai Obar dan 10 kes positif direkodkan.

Ismail berkata, KKM mengesahkan berlaku peningkatan kes di lokaliti itu dengan kadar kebolehjangkitan adalah tinggi.

Beliau berkata, sebanyak 42 ujian saringan pula dilaksanakan di Taman Villa Mas dan daripada jumlah itu, sebanyak tujuh kes positif COVID-19 direkodkan selain KKM juga mengesahkan berlaku peningkatan kes secara mendadak dalam tempoh seminggu serta masih terdapat 35 ujian saringan masih menunggu keputusan.

Katanya, KKM hari ini juga melaporkan peningkatan kes positif COVID-19 secara mendadak di Kampung Melangkap Tomis, dan sehingga kini KKM sudah melaksanakan 31 ujian saringan di lokaliti ini, dan daripada jumlah itu empat daripadanya didapati positif COVID-19.